



UPA 2015 / 115
21. april 2015
Agathe Fontain

**Pinartumik napparsimasoqartillugu ilaquataasut Københavnimi kalaallit peqqissartut najugaqarfianni ineqartinneqartillugit ineqarnermut aningaasartuutit 2016 aallarnerfigalugu pisortanit akilerneqartalernissaat sulissutigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq, Múte Bourup Egede)**

Inatsisartunut ilaasortap Múte Bourup Egede-ip, siunnersuuta Inuit Ataqatigiinniit paasilluarparput. Napparsimalluni ilaquattanik tapersorsorluarneqarnissaq pingaartorujussuuvoq. Ilisimavarput inuk toqqissisimassappat inuk ilivitsuussasoq, tassa tarneq, anersaaq timilu ataatsimoortinneqassasut, taamaasillunilu timi napparsimasoq peqqissinissaminut imminik suliarisinnaanerussaag.

Siunnersuuteqartoq ilumoorpoq. Peruluttunik, soorlu kræfteqartunik ilalersuineq ilaqutariinnut akisoorujussuanngartarpoq. Unalu siunnersuut aqqutigalugu ilaqutariinnut nalaataqartunut ilalersuutaassaqaq, isumalerujussuaq. Inuit Ataqatigiinniit isumaqarpugut siunnersuut akuerineqartariaqartoq, napparsimasunut ilaquataasunullu pitsanngorsaannissamik siunertaqaraanni.

Siunnersuuteqartup Múte Bourup Egede-ip pivai pinartumik napparsimasut, allanit, namminerluunniit aggernertik akilerlugu ilaquattaminnik najorneqartut. Pineqartut tassaapput, napparsimasup ineeqqamini ineqatigeriigai. Taamaammat ersarissunik malittagaqarnissaq siunnerssuteqartup siunnersuummini ilaatippaa.

Inatsisartunut ilaasortap Anthon Frederiksenip §37 naapertorlugu apeqquaqataanut akissummi nr. 197-imi takuneqarsinnaavoq, Kalaallit Peqqissartut Illuat ukiumut 1,2 mio. Kr.nik ingiallorteqarnermut isertitassatut aningaasartuutigisaraat.

Tassalu taakkorpiaat ilaat siunnersuuteqartup pisai. Inuit Ataqatigiit isumaqarput 1,2 mio. Kr iluanni siunnersuut akuerineqarsinnaasoq. Ilaqutariinnermullu Peqqissutsimullu ataatsimiititaliamut ingerlateqqinneqassasoq.